

एकादशोऽनुवाकः ।

तच्छंयोरारुणीमहे । गातुं यज्ञाय । गातुं यज्ञपतये ।
दैवीं स्वस्तिरस्तु नः । स्वस्तिर्मानुषेभ्यः । ऊर्ध्वं जिगातु
भेषजम् । शन्नो अस्तु द्विपदे । शं चतुष्पदे ॥ १ ॥

तच्छंयोरष्टौ ॥ अनु० ११ ॥

द्वादशोऽनुवाकः ।

आप्यायस्व सन्ते । इह त्वष्टारमग्नियं तन्नस्तुरी-
यम् । देवानां पत्नीरुशतीरवन्तु नः । प्रावन्तु नस्तु जये
वाजसातये । याः पार्थिवासो या अपामपि वृते । ता
नो देवीः सुहवाः शर्म यच्छत । उतग्ना वियन्तु देवप-
त्नीः । इन्द्राण्यग्राय्यश्विनी राट् । आरोदसी वरुणानी
शृणोतु । वियन्तु देवीर्य ऋतुर्जनीनाम् ॥ अग्निर्होता
गृहपतिः स राजा । विश्वा वेदजनिमा जातवेदाः ।
देवानामुतयो मर्त्यानाम् । यजिष्ठः स प्रयजतामृ-
ता वा । वयमु त्वा गृहपते जनानाम् । अग्ने अकर्म-
समिधा बृहन्तम् । अस्थूरिणो गार्हपत्यानि सन्तु । ति-
ग्मेन नस्तेजसा सः शिशधि ॥ १ ॥

जनीनामष्टौ च ॥ अनु० १२ ॥